

Hubentud den moveshon

Pasando stage na Aruba

NICOLE JACOBS INVESTIGANDO MATANAN DI ARUBA CIENTIFICAMENTE

Nicole Jacobs ta un di e hobennan Arubiano cu ta siguiendo un carera profesional na Hulanda, y cu a scoge Aruba pa pasa stage durante e fase final di estudio y presentacion di tesis pa bira Farmaceutica. Riba un base científico, e ta investigando e efecto di diez mata (remedinan di tera) di Aruba riba e sistema inmunológico humano.

Nicole a conversa cu "Hubentud den Movicion" tocante dicho proyecto den cual e ta trahando cu cooperacion di varios Arubiano individual of den instancianan cu ta conoce di matanan di Aruba, pero tambe den coordinacion cu Dr. Fun di Departamento di Inspeccion di Remedi, na Salubridad Publico.

PROYECTO: "Mi ta bezig cu mi bijvak cual ta encera cinco luna di investigacion di cual dos luna ta tuma lugar na Aruba. E bijvak ta encera dos fase: un academico y uno practico. Den e fase practico mi mester termina cu un proyecto riba mi mes. Mi a scoge pa haci un investigacion riba e matanan di Aruba.

Na Curaçao CARMABI a bini cu e mesun proyecto pero lastima cu no tabata tin ningun hende cu por a continue. Door di esey nos a coge e proyecto ey presente na Hulanda cerca mi profesor di farmacología y despues di a analice hunto e proyecto a bira un compromiso".

Nicole ta sigui bisa cu CARMABI kier a haci un investigacion riba cual di remedinan di tera tin propiedadnan antibacterial y antimicrobico, pero na School e Departamento a bay den otro direccion cu mas bien ta esun inmu-

nológico.

Esey kier meen ki propiedad cierto matanan tin pa ataca infeccionnan y pa traha riba e sistema inmunológico di e pacient.

Lamentablemente na Aruba no tin e equipo y material necesario pa haci e estudio aki localmente, pa cual motibo Nicole ta bay Hulanda cu diferente sorto di mata di Aruba pa ayanan realiza e estudio necesario.

POCO INFORMACION: Nicole ta colecta e matanan na Aruba y banda di esey e ta entrevista personanan cu pa añanan largo ta usa remedi di tera y cu ta conoce e historia di e matanan.

"Den bukinan nos ta haya hopi informacion di matanan di Surinam, Curaçao y otro, pero masha poco tocante esnan di Aruba. Pesey mi tin cu busca e matanan, di cualnan mi a haci un seleccion di e lista cu mi a cohe di CARMABI di cualnan mi a tuma informacion di literaturanan na Hulanda, y cu ta muestra cu nan por tin algun efecto inmunológico".

Nicole a saca 10 mata di un lista di 14. Entre otro, el a menciona: Basora cora, basora preto, herba hole, calbas, kibenki. Como cu tin hopi informacion riba aloe caba, nan a scoge otro sorto di matanan pa e investigacion aki.

E META: Ta asina cu riba mundo tin mas of menos un 300 mil specie di mata di cual di 7 pa 8% a worde investigada sistemáticamente. Mirando e hecho cu di e porcentahe aki a worde haya hopi sustancia interesante cu ta awendia ta ser usa den medicina regula, y mirando tambe e hecho cu e mondi di Amazonas ta desparce, tin un tendencia mundial den e

ramo di investigacion di matanan cu no ta mucho conoci, en busca di sustancianan cu por combati cancer, sustancianan viral, fungal, AIDS cu awendia ta un topico hopi interesante.


Saliendo for di e punto di bista cu naturaleza ta un fabrica cu ta produci sustancianan interesante y complica cu poco hende ta pensa riba nan y cu tog tin efecto riba e sistema organico humano, e estudionan aki ta ser efectua poco poco, cu e meta di evita cu cierto matanan bay perdi pa semper y tambe informacion bay perdi.

Na Aruba tin masha hopi hierba cu ta worde usa pero cu nunca a ser investiga di un manera científico. Loke tin ta bukinan descriptivo den sentido general parti di nan skirbi na Curaçao y algun informacion di don Julio Maduro (q.e.p.d), pero no tin mucho informacion individual.

E investigacion aki ta pa saca afo si tin un base quimico-farmacológico pakico hopi di nos hendenan ta usa e matanan aki como remedi.

Aruba y Antiyas en general ta teritorionan interesante unda cu nada no a worde haci compara cu Amazonas, Africa, India, etc. unda cu tin hopi medicina natural. Aruba maske cu ta un pais chiquito tin espacio pa investiga e matanan y contribui cu algo na Ciencia en general pero tambe na Aruba su cultura mes.

"Mi a cumenza mi investigacion na Hulanda mes dia 3 di Mey, den un luna mi a busca hopi informacion. Despues mi a bini Aruba y nos a pone tur cos riba papel y a cumenza comunica cu hendenan cu conoce di mata. Door di intrevistanan mi sa



cual ta e matanan cu te ainda ta hopi usa, menera stropi Calbas.

"Supuestamente mi mester ta cla cu henter e investigacion na December aña aki. E resultadonan ta bay worde presenta den forma di un tesis di cual mi ta bay manda Aruba un copia. Si mi ta haya algo interesante lo mi sigui investiga pa bay den detayenan riba e producto". Nicole no ta completamente sigur si e lo bini traha na Aruba Despues di su tesis final e ta bay haya un doctorado (drs) den Farmacia pero e tin cu practica dos aña prome cu e haya autorizacion pa traha como farmaceutica.

PROCEDURA: Na promer lugar Nicole ta haci un screening di e matanan, selecta esnan mas interesante, saca e stracto di nan pa wak si enverdad nan ta afecta e sistema di inmunidad.

Den un siguiente fase si e estudio ta sali positivo, lo por sigui investiga nan pa saca afo kico ta e factor prin-

cipal cu ta causa efecto.

No ta asina cu door di e estudio aki ta bay saca remedi pa bay riba mercado, ya cu esaki ta cuestion di añanan largo di investigacion. Si tin un resultado interesante di e investigacion aki no ta prome cu alomenos diez aña mas, cu por desaroya algo cu por worde usa. Pero e investigacion preliminar aki ta hopi util mes.

E unico obstaculo cu Nicole a haya pa su investigacion ta e segura cu tin den e dianan aki.

YAMADO NA COMUNIDAD: Nicole kier a probecha e entrevista cu Hubentud den Movecion, pa e personanan cu ta conoce di mata y tin mas informacion riba e topico tuma contacto cune. Esaki por ta a traves di telefoon 21876.

Nicole, e.o. a bishita Departamento di Agricultura, Cria y Pesca y tambe Don Mario Odor den busca di mas informacion. Tur loke otro personanan por aporta pa realiza su trabao di un manera optimal e lo aprecia esey masha hopi mes.